

**Mustapa Ketengah Resipi Untuk BN Kembali Terajui Kelantan
Bernama
29 Januari, 2012
Oleh Mohamad Bakri Darus**

KOTA BAHARU, 29 Jan (Bernama) -- Pengerusi Badan Perhubungan Umno Kelantan Datuk Seri Mustapa Mohamed menggariskan beberapa faktor termasuk menurunkan calon yang "ada oomph dan faktor wow" yang akan menjadi penentu bagi Umno dan Barisan Nasional untuk kembali berkuasa di Kelantan pada pilihan raya umum ke-13 nanti.

Beliau berkata Umno dan BN Kelantan mesti kuat untuk memasuki "medan pertarungan" dan menjuarai pertandingan akan dijangka sengit kali ini.

"Alhamdulillah pemimpin kita (Perdana Menteri) Datuk Seri Najib Tun Razak kuat diterima rakyat begitu juga timbalannya Tan Sri Muhyiddin Yassin, tetapi itu tidak cukup kalau Umno dan Barisan Nasional Kelantan tidak kuat, jadi semua kena kuat, barulah rakyat terima kita," katanya dalam temuramah khas dengan Bernama di sini.

Mustapa, yang juga Anggota Parlimen Jeli dan Menteri Perdagangan Antarabangsa dan Industri, berkata faktor calon adalah perkara yang amat penting yang akan menjadi penentu sama ada BN mampu menumbangkan Pas yang sudah 22 tahun menerajui Kerajaan Kelantan.

Pada pilihan raya umum yang lepas pada 2008, Pas memenangi 38 kerusi Dewan Undangan Negeri, BN enam dan Parti Keadilan Rakyat satu. Bagi kerusi Parlimen pula, Pas memenangi sembilan, PKR tiga dan BN dua.

Mustapa berkata walaupun belum dimuktamadkan, Umno Kelantan sudah mempunyai senarai "winnable candidate" atau calon boleh menang, untuk bertanding pada pilihan raya ke-13 nanti.

"Pada masa lalu mungkin ada kesilapan di beberapa tempat. Secara umumnya calon kita bagus tetapi ada beberapa tempat yang mungkin kurang sesuai, sebab itu kita kalah di tempat berkenaan," katanya.

Mustapa berkata pada kali ini, Umno perlu lebih berhati-hati dalam membuat keputusan iaitu hanya calon paling "winnable" dicalonkan bagi sesuatu kerusi pilihan raya.

"Konsep winnable candidate ini bukan sahaja calon itu popular dalam Umno tetapi diterima dengan baik oleh semua pihak. Kalau hanya popular dalam Umno, kita kalah...wajib. Tak boleh masuk pilihan raya, hari pertama sudah kalah walaupun anggota Umno ramai tetapi mereka tidak cukup untuk memenangkan calon kita.

"Winnable candidate ini bukan hanya popular dalam parti tetapi mesti juga popular dengan rakyat, badan bukan kerajaan, pegawai kerajaan, polis, tentera, veteran dan lain-lain. Winnable candidate ini hendaklah dapat menarik minat, ada 'oomph', ada faktor 'wow', yang boleh menarik minat. Bukan saja orang Umno tetapi semua golongan pengundi, termasuk pengundi atas pagar," katanya.

Mustapa berkata, untuk memenangi pilihan raya umum ini, Umno Kelantan tidak ada pilihan melainkan menampilkan calon yang terbaik.

Oleh itu, anggota dan semua pemimpin Umno Kelantan mesti menerima apabila pucuk pimpinan parti membuat keputusan muktamad calon yang akan diturunkan pada pilihan raya ke-13 dan jangan ada sesiapa pun yang sabotaj parti atau mengamalkan "cah keting atau menikam dari belakang" kerana ia akan menguntungkan lawan, katanya.

Mereka yang bercita-cita untuk dipilih sebagai calon mesti menilai kemampuan diri sendiri dan tidak cuba menonjolkan diri yang akhirnya akan memerangkap mereka dalam kekecewaan, kata Mustapa.

"Biasanya orang yang tonjolkan diri akan ditolak. Pada zaman Rasulullah, orang yang tonjol diri ini awal-awal lagi tidak dipertimbangkan, pada zaman Khulafa Ar-Rasyidin, biasanya kalau seseorang itu kata dia paling layak, dialah mungkin tidak layak," katanya.

Beliau berkata Umno menyedari dalam sesuatu kawasan pilihan raya terdapat beberapa calon yang dianggap "winnable candidate" dan walaupun wujud kesukaran dalam membuat pilihan, kesepakatan dan taat kepada pemimpin akan menjadikan pemilihan itu mudah.

"Kita tahu ramai yang layak, ramai yang winnable, mungkin dalam satu kawasan ada tiga orang yang semuanya winnable candidate, jadi dalam konteks itu kita pilih yang terbaik di kalangan winnable candidate.

"Misalnya dalam satu kawasan DUN ada dua calon winnable, dalam kawasan Parlimen pula ada tiga hingga empat calon winnable, maka kita nak pilih yang paling winnable di kalangan winnable itu.

"Jika ada tiga calon winnable, kita pilih yang paling winnable, yang dua lagi itu hendaklah bersabar, menerima realiti bahawa kita boleh pilih seorang sahaja dan yang dipilih itu adalah yang terbaik, bukan maknanya yang tidak terpilih itu tidak baik, dia baik juga, dia winnable juga tetapi kita nak yang paling winnable.

"Maka yang dua yang tidak terpilih itu jangan nyitok (melenting), jangan sabotaj, itu yang penting. Harus ada kesabaran dan disiplin kerana dalam perjuangan ini kita nak menang, kalau dengan tindakan kita memberontak atau sabotaj ia boleh melemahkan parti maka tidak guna perjuangan kita untuk merampas Kelantan daripada Pas," kata Mustapa.

Sejarah merakamkan kekalahan Umno dan BN di Kelantan sejak 1990 bukan kerana Pas kuat tetapi Umno lemah akibat "cah keting" sesama sendiri kerana tidak dipilih sebagai calon atau tidak memperoleh jawatan yang diidamkan dalam bahagian sehinggakan terdapat jentera pilihan raya memboikot kempen pilihan raya.

Mustapa berkata untuk menang dalam pilihan raya umum ke-13, semua pemimpin Umno bahagian dan sayap Wanita, Pemuda dan Puteri serta veteran Umno perlu berganding bahu bekerja dalam satu pasukan dengan satu matlamat untuk merampas kembali kerajaan negeri Kelantan daripada Pas.

Beliau berkata "gelombang merah", satu gerakan yang diwujudkan tahun lepas, semakin menyemarakkan semangat perpaduan dan kerja berpasukan dalam kalangan anggota dan pemimpin parti.

"Gerakan 'gelombang merah' ini telah berjaya untuk menyatukan kita di bawah satu panji

untuk kita lebih komited menjalankan tugas memastikan kemenangan Barisan Nasional," katanya.

Mustapa berkata pemimpin Umno di semua peringkat perlu sentiasa turun padang menemui rakyat bukan sekadar apabila adanya program anjuran kerajaan atau parti, kerana dengan cara itu masalah rakyat boleh dikenal pasti, difahami dan diselesaikan dengan berkesan.

Semua pemimpin bahagian dan tiga sayap Umno tersebut tidak boleh lagi mengharapkan gerak kerja dilakukan pemimpin peringkat negeri sebaliknya mereka mesti bersama-sama menjelajah ke seluruh pelusuk negeri melaksanakan program parti dan dengan inisiatif sendiri melakukan "sentuhan peribadi" agar segenap lapisan rakyat merasai pemimpin Umno sentiasa dekat di hati mereka, katanya.

Mereka perlu menemui seberapa banyak kumpulan masyarakat termasuk badan bukan kerajaan, penjawat awam, pesara kerajaan, petani, nelayan, peniaga dan golongan muda, supaya kumpulan tersebut menghargai bahawa pemimpin Umno sentiasa prihatin untuk membela nasib mereka, kata Mustapa.

"Kita berasa bangga 'Jalinan Rakyat', satu jentera di bawah Wanita Umno telah bergerak di setiap bahagian, mereka menziarah kampung-kampung dan saya nak maklumkan jentera yang paling kemas ialah Jalinan Rakyat iaitu seorang ahli jaga 10 keluarga di mana mereka mengenali keluarga tersebut, jika ada apa apa masalah mereka tahu, ada bantuan, merekalah yang menyalurkannya," katanya.

Mustapa berkata perkara lain yang mesti diberi keutamaan ialah jentera penerangan di semua peringkat perlu sentiasa aktif agar rakyat memperoleh maklumat yang tepat mengenai dasar-dasar kerajaan.

"Menyerang adalah amat penting, mana-mana peperangan, kita kena serang, kita sudah menyerang. Penerangan itu mustahak, kalau rakyat tidak mendapat penerangan, kita tidak boleh persalahkan mereka kalau mereka punyai pandangan serong terhadap kita," katanya yang mahukan aktiviti penerangan diperhebatkan secara berterusan ke seluruh negeri.

Mustapa berkata sekiranya rakyat tidak mendapat penjelasan terhadap sesuatu isu, sudah pasti mereka akan terpengaruh dengan fitnah yang disebarkan oleh pembangkang dan ia akan menghakis pengaruh dan kepercayaan rakyat terhadap Umno.

"Dua puluh dua tahun adalah tempoh terlalu lama bagi sesebuah negeri di bawah pemerintahan pembangkang. Saya yakin dengan kerja kuat kita semua, kita semua bersatu hati, tiada perpecahan, taat pada pucuk pimpinan, BN akan kembali memerintah Kelantan pada pilihan raya kali ini," katanya.

--BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=642739>